

դից 1606 թւին, Նահ-Աբբասի ձեռքով. նրանք բարձրահասակ են, քաջ և կրօնասէր. պարապում են գլխաւորապէս հողագործութեամբ, խաշնարածութեամբ և մասամբ էլ այգեմշակութեամբ. կան նաև փոքր թւով կոշկակարներ, խաւութպաններ, բրուտներ և այլն:

Գիւղն ամբողջ հօթը դօնգ է, որի հինգ մասը սեփական է և երկուսը դպրոցապատկան (Նոր—Ջուղայի Ս. Ամենափրկչ. Հոգևոր գիշերօթիկ դպրոցին է պատկանում): Գիւղացիներից միայն 65 տուն հող ունեն, իսկ մնացեալները հողազուրկ են. նրանք մշակում են դպրոցապատկան հողերը և ստացած բերքից 43 խալվար ցորեն և 13 խալվար գարի տալիս են դպրոցին, իսկ պետական հարկ վճարում են 400 թուման:

Այժմ գիւղն ունի 170 տուն 1170 շնչով, որի 580-ը արական է և 590-ը իգական: Բաղկացած է գիւղն երեք թաղերից — Գիւղ, Ղալէ և Նոր-ղալէ: Գիւղն ունի մի եկեղեցի Ս. Յովհաննէս անուանով, որի բակում է գտնուում դրպրոցը, որտեղ յաճախում են ձմեռը 60-ից աւելի երկսեռ աշակերտներ. երկրագործական զբաղմունքների պատճառով՝ սովորաբար գարունքից սկսւում է թիւը քչանալ: Այս տարի դպրոցում դասաւանդում էին մի ուսուցիչ և մի վարժուհի (օր. Վարդուհի Աւետիքեան, որ նշանակւած է Նոր — Ջուղայի Գիւղական Յանձնախմբի Վարչութիւնից): Նոր-Ղալէն ունի Ս. Ներսէս եկեղեցին և մի դպրոց, իսկ Ղալէյում գտնուում է Ս. Աստուածածին եկեղեցին. սա գիւղի ամենագեղեցիկ եկեղեցին է, որի սեղանի քարի առաջը պատկերացրւում է Յիսուսի 12 աշակերտները, Ս. Աստուածածինը, Յիսուսի խաչելութիւնը, դրախտը և Ադամ ու Եւան պարտիզում: Եկեղեցու սեղանին կից գտնուող երկու սիւնների վրայ կայ փորագրութիւն, որն առաջ եմ բերում, սրովհետև պատկանում է եկեղեցու շինութեանը.

Ա. կառուցու այս սբ. եկեղեցին հրամանաւ Ծայրի Եպիսկոպոսի եւ օծաւ Հոկտեմբերի 10. 1892:

Բ. Հիմնադրուիւց սբ Աստածան եկեղեցոյ Մարտի 10. 1892.